

Mud Volapüka

Nüm 24

16 setul 2016

Rubrig gramatik

Lä

Präpod „lä“ jonon:

1) blibi nilü bos;

seadom **lä** filetatopafön = seadom **nilü** filetatopafön = seadom

len filetatopafön

seadoms **lä** od = seadoms **nilü (sa sam, viso)** od

blibof ai **lä** ob = neai ulüvof obi

2) mufi lü bos;

seitölös moni **lä** ret = seitölös moni **lü** ret = lüükölös moni at **lü**

retik

pokolös oni **lä** ol = kiplölös oni **pö** ol = ai **kelabolös** oni

3) leigodi ko bos.

pluof **lä** sör okik demü jön logotik = labof jöni süperikum **leigodü**

sör oka = pluof söri okik demü jön logotik

lä obs fidobs tü düp velid = obso fidobs (**pö** dom obas) tü düp
velid

Läs

Ladvärb „läs“ sinifon „neplu“.

cif at labon belödanis **läs** degmil = cif at labon belödanis **no plu (neplu)** degmil = cif at binon *smalik*, bi labon belödanis **läs** degmil labob könädis te kil, ab labol könädis lul. kil binon **läs** ka lul (3 < 5), klu labob könädis **läs** ka ol = labob mödoti könädas **läs** ka ol = taädo, labol könädis **plu** ka ob

Lü

Präpod „lü“ jonon das yeg anik mufon, lüodon ad nilikön *nilo u ini* bos (sinif verätik sekidon de yumed/tikodayumät):

eblinob penedi **lü** potöp (ad potön oni **lü** ek) = eblinob penedi **äl** potöp = eblinob penedi potöpio = eblinob penedi **ini** *bumot* potöpa ägolob **lü** dom = ägolob domio *u* änilikob **nilo** dom

ägolob **lü** lom ad kobokömön ko om = ägolob lomio ad kobokömön ko om in(ninü) lom *u* änilikob **lü** dom ad kobokömön ko om nilo lom

älogedob **lü** om = älogedob omi = älüodükob logedi okik **sui** om
älogedob **lü** bok = älogedob boki, **no** älogedob **ini** bok (no älogedob bukis papladöl **in** bok)

gleipön **lü** musak = steifülön ad gleipön musaki

vokädön **lü** yuf = vokädön **ad** yuf = vokädön „yufö!“ = yufidön vokädölo

Ma, maä

Präpod „ma“ e konyun „maä“ sinifons „bai ...“, „baiädon“:

kanitön **ma** noats = kanitön **bai** noats = kanitön **demölo** noatis

pelön **ma** baläd = pelön **vio pilonon pö** baläd = pelön **maä**

pilonon pö baläd

kömob-li **ma** ol, pötiko? = kömob-li **cedü** ol, pötiko?

Me

Präpod „me“ jonon das pö jen anik bos pagebon:

dugön **me** *nam* cili = dugön cili **kipölo** *nami ona*

musigön **me** *viäl* = musigön **gebölo** *viäli*

bleinob **me** *logs bofik* = *logs bofik obik* logons nosi, baiädiko binob
bleinan

drinön **me** *drinod balik* = fidrinön löliko **me** *naed bal* = fidrinön
löliko **duinölo** *drinodi bal*

Mo

Präpod „mo“ sinifon „isao“ e jonon das yeg diton de bos:

golön **mo** e *ge* = **mogolön** e *gegolön* = golön **isao** e *isio* = golön

de is e golön *taädo* lü is

zib äbinon nesmekik e bötan eblinon oni **mo** ed eblinon (pla on)
ge votiki = bötan **emoblinon** oni ed egeblinon (pla on) votiki

moö! = isaö!

Sevols-li, das ... Gvatemän



1) Gvatemän binon län gretikün Zänoda-Meropa ma mödot belödanas (plu balions 14). Nem läna sinifon „plad kö bims mödik glofons“.




2) Tö Gvatemän volkans 33 papladons bevü kels 4 jäfidikons nutimo.



3) Gvatemän binon blünän ledinik kafa legudik pro fiama benosevädik el ‚Starbucks‘. Ut binon län jölid vola ma mödot kafa

pameköl (touns plu tumluldegmil a yel), Gvatemäna voböl alik kilid jäfadon pö dustod kafik.



4) Völäd Gvatemäna panemon el ‚Quetzal‘ nemü böd leiganemilabik kel no kanon lifön pö nelib. Böd at binon sümbol liba. Bü lunüp plüms bödas pägebons as mon, das plänädon rigi nema könäda.

5) Gvatemän binon motedalän lalpabexänana jiel ,Andrea Cardona’.



Säkis, küpetis e lofotis aliks ä materis e volanuns nitediks kanols lüsedön lü penedabog «komunan@yandex.ru».